

## E mords Erfindung

Omm letzde Somsdaach hott mich de Schorsch oogerufe unn hott mich gefroochd, ob ich im Fernseh die Sendung mett dene ville Veeschel geseh hädd. „Waaßde, die mett denen Starn iwwer Rom unn dene Watveeschel onn de Nordsee.“

„Ei nodierlich“, habb isch ze Antwort gewwe, „su ebbes muss merr geseh hawwe. Dess warn joo Millione vunn Starn iwwer Rom unn Zehdausende vunn dene Watveeschel onn de Nordsee. Unn wenn die all in de Luft sinn, isses grad e besonner Schauspill.“

„Genau doo druff will isch enaus, Honnes“, seet de Schorsch. „Wenn die su Schwenkung mache wie uff Kommando, doo wernn die Veeschelwolke dichter odder lichter, je noochdem wie die Sunn druffscheine dut, unn grad bei dene Watveeschel sieht merr oomol nor weiße Bäuch unn gleich druff nor die dunkele Rücke unn koon Voochel dut emm onnern in die Quer kumme, die dun sich noch nitt emol mett ihrne Flitsch beriehrn, wie dess nor vor sich gieht?“

Isch habb gelacht. „Die Veeschel hawwe sicher su Sensorn in de Flieschelspitze, grad wie mir se in de Audos hawwe zum Oiparke: Wenns piepse dut, donn Owacht gewwe.“

„Sensorn?“, frächt de Schorsch.

Isch saach: „Ja Sensorn, unn dessdeweese stumbe die sich nitt vumm Himmel.“

No ja, dess iss omm letzde Somsdaach gewese, unn wie isch omm Moondaach dem Schorsch soi Fraa, uff de Gass geseh habb, hottse mich schebb oogeguggd unn gefroochd: „Was hosde donn dem Schorsch widder fern Tipp gewwe omm Somsdaach?“

Isch bin verschrocke. „Ei was donn fern Tipp, Kättche? Mir hawwe uns nor iwwer su e Fernsehsendung mett Veeschel unnerhalle.“

„Dess hott gelangd“, seets Kättche. „Weil heit isser mett unserm Nochber Fritz ...“

„Fritz, Fritz?“, frooch isch, „de Elektriker?“

Dess Kättche hott genickt. „Ja, mett dem iss de Schorsch nooch Hochem gefahrn in e Audowerkstatt, doo wolle die ebbes ausbaue.“

„Saach doch bittschee dem Schorsch, er soll mich emol oorufe“, habb isch gesaad, „isch deet doch gern emol wisse, was die Veeschel meddere Audowerkstatt ze due hawwe.“

Geesche Owend hott mich donn de Schorsch oogerufe. „Was iss?“, hodder gefroochd, „was willsde, Honnes?“

Isch saach: „Isch deet gern emol wisse, wassde meddem Fritz in Hochem gemacht host, weils Kättche mir verzähld hott, isch wär droo schuld onn doim Ausfluuch.“

Doo seet de Schorsch: „Dess Kättche iss schunn omm Nähe. De Fritz unn isch, mir hawwe aus emm kabuddene Audo sechs Sensorn ausgebaut, die näht merr jetz dess Kättche in e ald Jack, donn wernn dinne Dräht droo gemacht unn die meddere Batterie verbunne.“

„Um Gotteswille, Schorsch“, habb isch ins Telefon gerufe, „was sinn denn dess widder ferr Bosse?“

Doo seet de Schorsch: „Koo Bosse. Jacke mett Sensorn droi sinn e mords Erfindung ferr Leit, die uff ihr Smartfon gugge unn midde dorsch enn Haufe Leit giehn. Weil wonn dene ooner näher kumme dut, duts piepse, unn donn renne die kooner mieh um. Doo sollde merr e Badent druff mache, hott de Fritz gesaad, unn dess mache merr aach.“

Eiern Honnes